


KOHA

për

Gratë



Qendra Kosovare për Studime Gjinore
Kosovar Gender Studies Center

Një rrëfim tjetër për gratë në politikë



Sibel Halimi

Tregimi për “gratë në politikë” sot duhet të rikoncepohet nga gratë për gratë. Në të kundërtën, vështirë që vajzat e reja do të kenë vullnetin të kontribuojnë për vendin nëpërmjet angazhimit të tyre në politikë.

Boshti kryesor i temave mbi të cilat është ndërtuar narrativa e përfshirjes së “grave në politikë” thuhet se nuk ka ndryshuar që nga paslufta. Operimi me tema të njëjta për vështirësitë e grave në politikë, siç janë kuotat dhe mundësitë e barabarta, nuk ka sjell rezultate për ndërtimin e një mendësie të re politike dhe shoqërore. Kjo për faktin se gratë në politikë kanë stagnuar në harmonizimin e dinamizimit të agjendës së tyre politike me ndryshimet shoqërore që po ndodhin në vend dhe përfaqësimit të interesave të grave e vajzave.

Korniza konceptuale e politikës, e përbërë nga çështjet që lidhen kryesisht me rikthimin e temave nacionaliste, e ka bllokuar inicimin e çështjeve që shpijnë shoqërinë drejt emancipimit. Rrjedhimisht, edhe gratë nuk kanë arritur t'i tejkalojnë barrierat e krijuara tanimë, duke ua pamundësuar që ato të bëhen zëri i ndryshimit. Fatkeqësisht, rikthimi në diskursin publik i mizogjenisë është ndihmuar edhe nga heshtja e grave në politikë dhe në debatin shoqëror. Ndryshimet që po ndodhin në shoqërinë kosovare - pavarësia dhe vendimmarrja e grave, sado simbolike, por me fuqi mediale, është duke i mobilizuar ideologjitë konservatore që janë në të kundërtën e fuqizimit të grave në veçanti, si dhe emancipimit shoqëror në përgjithësi. Në një kontekst të tillë, politika në mungesë të vetëdijes e vizionit të qartë të orientimit vleror propeëndimor ka rënë në grackë. Madje edhe institucionet shtetërore, të cilat janë krijuar nga vlerat demokratike, janë duke u shfrytëzuar për qëllime propagandistike në dëm të vlerave demokratike. Ndaj, si kurrë më parë, shtrohet

nevoja që gratë e politikës ta braktisin traditën patriarkale, duke e zëvendësuar me qëllime më të rëndësishme, siç është promovimi e garantimi i lirisë individuale, të cilat duhet të mbrohen dhe të respektohen nga qeverisja dhe strukturat shoqërore.

Kushtetutshmëria, streha e vetme për gratë

Trupi i grave është më shumë se një entitet fizik, është një shtëpi për identitetin dhe përvojën e saj njerëzore. Në shoqëritë patriarkale, trupi i grave është i nënshtruar ndaj parimeve dhe normave të cilat përputhen me ideologjinë patriarkale. Ndaj, si i tillë në politikë, trupi i grave është shfrytëzuar për t'i përmbushur pritjet dhe kërkesat e shoqërisë. Pikërisht në një kontekst të tillë, çështjet që determinojnë vendimmarrjen e grave mbi trupat e tyre prekin direkt kallon e shoqërisë patriarkale. Prandaj, nuk është i rastësishëm shqetësimi i krijuar për Projektligjin për Shëndetin Riprodhues dhe Fertilizim të Asistuar Mjekësor. Gjuha e urrjetjes në diskursin publik lidhur me projektligjin ka shpërfaqur rezistencën për emancipimin dhe diversitetin e shoqërisë. Liria dhe drejta individuale, të garantuara më Kushtetutën e Republikës së Kosovës, janë vlerat e vetme që duhet të përfaqësojë secili/secila deputet e deputete. Botëkuptimet personale të referuara identitetit të tjera do t'i sjellin dëm të madh vetë gruas dhe përfaqësues historike të elitave për të ndërtuar një shoqëri të lirë dhe demokratike.

Jehona e zërave kundërshtues për moskalinim e projektligjit, e sidomos gjuha e urrjetjes e shpërfaqur në debatin shoqëror, është përtej mandatit që përfaqëson edhe Kryetarja e Komisionit për të drejta e njeriut, Dude Balje. Ndaj, lirimi i një posti të tillë është domosdoshmëri emergjente, jo për arsye të bindjeve konservatore, por për shkak të mospërfilljes së laicitetit të shtetit. Heshtja dhe indiferenca e të gjitha grave që janë të përfshira në jetën publike është praniam i cenueshmërisë që po i bëhet të gjitha grave dhe vajzave në Kosovë.

“Gratë në politikë” vs. “Burrat në politikë”


Për ta kuptuar pozitën e grave në politikë dhe në jetën publike mjafton të shtrohet pyetja: Çfarë jemi duke menduar tani? Gjuha e urrjetjes, fyerja dhe mizogjenia, sot janë pothuaj

jse karakteristikat esenciale që e përbëjnë diskursin publik. Në këtë gjendje shoqërore në të cilën jemi, gratë në politikë nuk kanë arritur të sjellin një model tjetër inkurajues për vajzat që pretendojnë të merren me jetën publike në përgjithësi. Ndaj, si i tillë, subjektiviteti i tyre është thuhet i shkrirë brenda formacioneve të paracaktuara, i trashëguar nga sistemi vleror e i etabluar tanimë. Politikën kosovare sot e karakterizon, në çështjet që lidhen me gratë dhe vajzat, kryesisht izolimi brenda gjinisë. Politika duhet t'i rikoncepohet gratë në politikë, pikërisht duke e dekonstruktuar e zhvendosur atë nga identiteti kolektiv në atë individual. Asnjëherë deri më tani nuk është dëgjuar sintagma: “Përfshirja e burrave në politikë”. Përhumbja e nocionit “burrë” është predispozuar ta tejkalojë identitetin gjinor, rrjedhimisht duke e glorifikuar deri tek një sundimtar të heshtur, fuqia e të cilit është përbrendësuar aq thellë në mendësinë kolektive.

Përfshirja e grave në politikë, si një koncept që vë në spikamë “gruan”, determinoi edhe fatin e saj në politikë. Tanimë identiteti personal i krijuar më shumë mund, barazon dhe shkrin atë brenda kategorisë “gratë në politikë”. Pavarësisht përpjekjes qëllimërisht në fuqizimin e grave në politikë, megjithatë përdorimi i sintagmës “gratë në politikë” dëmtoi rëndë shëndetin politik të tyre brenda partive politike. Për fat të keq, gratë që kanë zgjedhur angazhimin në politikë janë të kurthura në kritikim të çdo hapi që bëjnë. Nëse janë pasive dhe nuk e ngritin zërin, cilësohen si të dobëta, të varura dhe të nënshtruar ndaj burrave. Nëse revoltohen dhe kërkojnë veprim institucional për çështje që preokupojnë vet ato dhe shoqërinë, emërtohen si “të egra”, “të frustruara”, e deri edhe “histerike”.

Një shoqëri që ka priren për të vënë nën llupë çdo veprim të grave, e në anën tjetër duke injoruar “elefantin në dhomë” - aferat korruptive, e çka jo tjetër, të burrave - vështirë të arrijë të përfitojë nga potenciali i fjetur i gjysmës së përbërjes së saj. Sepse në fund të fundit, vlerat njerëzore, profesionale e intelektuale, duhen peshuar aq sa vlejnjë realisht, pa optikën e deformuar të diferencimit gjinor.

Autorja është Drejtore e Kulturës në Komunën e Prishtinës.



Koha për gratë dhe vajzat



Anisa Ruseti

Në Shqipërinë e vitit 2024, 10 nga 17 ministri në Kabinetin Qeveritar drejtohen nga gra dhe vajza; Kryetarja e Kuvendit është grua, 48 nga 140 deputetë në Kuvend janë gra dhe vajza; 4 nga 5 nënkryetarët e Bashkisë Tiranë janë gra, ndërsa Këshilli Bashkiak i Tiranës drejtohet nga një grua.

E nis me këtë panoramë statistikore për të dëshmuar që në krye të këtyh shkrimi se koha për gratë ka ardhur në Tiranë. Por, teksa jam e palëkundur në bindjen time se grua nuk është një qenie e dobët, apo e pamjaftueshme, kam po ashtu bindjen se gratë ende nuk e vlerësojnë angazhimin publik e shoqëror me të njëjtën rëndësi që i japin familjes.

Studimet e fundit në Shqipëri tregojnë, paradoksalisht, dy anë të ndryshme të së njëjtës medalje. Nga

njëra anë, një studim i fundit i FES tregon se 89% e të anketuarave mendojnë se duhet të ketë më shumë gra të përfshira në politikë, se vendi duhet të ketë një kryeministër grua, dhe se vendi duhet të ketë një presidente grua. Por, nga ana tjetër, po vetë të intervistuarat tregojnë shumë pak vullnet për t'u përfshirë në politikë, me arsyetimin (ose justifikimin) se gratë paragjykojnë më shumë se burrat, dhe se stereotipat gjinorë në lidhje me detyrimet për familjen dhe shoqërinë vazhdojnë të jenë ende të forta dhe praktikisht shërbejnë si deterrent. Pra, teksa të reja dhe gratë besojnë se pjesëmarrja e tyre duhet të jetë më e lartë dhe se kjo pjesëmarrje ndikon pozitivisht në avancimin e shoqërisë, një opinion i tillë nuk përkethehet në angazhim vetjak, e rrjedhimisht kjo krijon efektin e një rrethi vicioz i cili nuk lejon një ndryshim të situatës.

Pavarësisht paradoksit të lartpërmendur, ekziston një potencial i jashtëzakonshëm i grave dhe vajzave për t'u pozicionuar në politikë e angazhim publik, ani pse përqindjet na vendosin përpara një reflektimi të detyruar lidhur me faktin që gratë dhe vajzat janë ende në ndikimin tepër të fortë të stereotipave mbizotërues në shoqërinë

tonë, teksa ndryshimi do të duhet të ndodhë në nivel personal e institucional. Si mund të nisë ky ndryshim, veçanërisht nën optikën e pushtetit vendor?

Meqenëse pas familjes, komuniteti dhe bashkia zënë një hapësirë të konsiderueshme ku gratë mund t'i shprehin lirish qëndrimet e tyre, apo t'i sipërfaqësojnë pozicionimet e tyre politike, nisur nga eksperienca dhe rrugëtimi im disaveçar në pozicione drejtuese në Bashkinë Tiranë, kam sigurinë se politikë dhe paketat sociale të ndërtuara me në qendër gratë dhe vajzat kanë ndikuar në rritjen e cilësisë së shërbimeve dhe në krijimin e një mjedisit më miqësor për të nxitur pjesëmarrjen në procese vendimmarrëse. Në jetën time politike kam pasur fatin dhe privilegjin të bashkëpunoj me shumë gra dhe vajza; disa tradicionalisht të përkushtuara ndaj familjes, ashtu si edhe të tjera të dedikuara për të lënë një gjurmë në aktivizimin shoqëror, profesional e politik. Tradita jonë e mbrojtjes me shumë dashuri të familjes vijon të ketë një vlerë shumë e madhe shoqërore, e cila duhet lartësuar përherë në memoriam kolektive për ta vlerësuar gruan në rolin e saj. Sidoqoftë, ne nuk duhet të lejojmë që grua të

simplifikohet vetëm me punën dhe kohën ende të pavlerësuar në familje, pasi shoqërisë i duhet mprehtësia dhe inteligjenca sociale dhe profesionale e gruas. Roli i saj është i pazëvendësueshëm brenda mureve të një shtëpie të ngrohtë e të konsoliduar, ashtu sikundër energjia e saj është e pamatshme brenda një shoqërie që ndryshon dhe kërkon të ndryshojë drejt së mirës, drejt harmonisë sociale dhe progresit koheziv.

Sipas të dhënave nga Agjencia Kombëtare e Kërkimit Shkencor dhe Inovacionit, në Shqipëri, gratë dhe vajzat në shkencë pasqyrojnë një kontribut më të madh sesa burrat, angazhohen më shumë se ta, teksa gradat e titujt akademik përfitohen më shumë nga gratë dhe vajzat sesa nga burrat dhe djemtë. Ky është një moment për t'i përgëzuar dhe inkurajuar edhe më tej gratë dhe vajzat në shkencë, sakrificën e tyre për të shënjur suksesin, por edhe për t'i dhënë një produkt të dobishëm shoqërisë, botës akademike dhe zhvillimit socio-ekonomik. Njëkohësisht thirrja duhet të vijë për gratë që të mbështesin e lartësojnë të tjera gra e vajza përreth tyre. Fuqizimi i njëra-tjetrës nuk është një mision për t'i dominuar burrat, por kundërpërgjigje

natyrale e intuitive e faktit se gratë dhe burrat janë qytetarë të dorës së parë dhe se rrugëtimi tyre drejt suksesit (në familje a profesion), duhet të ketë përgjegjësi dhe përfitime të barabarta.

Në mbyllje dëshiroj t'i falënderoj gratë dhe vajzat e Tiranës për profesionalizimin dhe investimin e tyre në shoqëri; gratë dhe vajzat sipërmarrëse për kontributin që japin në ekonominë e qytetit; gratë dhe vajzat e shoqërisë civile për riskun që ndërmarrin, kurajën dhe këmbënguljen për të mos lënë pas dore asnjë kauzë a çështje sociale, mjedisore, ekonomike, politike të qytetit. Tirana jonë është kurorëzuar si Kryeqyteti i Rinisë, Qyteti Evropian i Sportit, apo Kryeqyteti Mesdhetar i Kulturës dhe Dialogut, por jam e bindur që nëse do të kishte një të tillë, do të merrte dhe çmimin si Kryeqyteti i Grave dhe Vajzave, si kampione e mjedisit miqësor dhe mbështetës për fuqizimin dhe promovimin e grave dhe vajzave në çdo fushë publike. Le të vijojmë me mbështetjen ndaj njëra-tjetrës, me shpresën se vajzat tona do të rriten me dashurinë për familjen dhe me forcën për profesionet dhe pasionet e tyre!

Bashkia Tiranë.

Barazia gjinore e grave: Për barazinë, lirinë e “grabitur” dhe rezistencën



Biljana Kašić

“Nuk është një koncept mobilizues për të rinjtë dhe as ‘sexy’”, më tha së fundmi një nga studentet e mia që e konsideron veten përfaqësuese të brezit queer dhe e trajton çështjen e identiteteve seksuale/gjinore, veçanërisht çështjen e grave dhe luftërat që bëjnë për barazinë e tyre, si një angazhim të vjetruar ose diçka passé. Edhe pse e di që çështja e barazisë sipas gjinisë/seksit është shumë më komplekse dhe nuk mund të reduktohet lehtësisht në identitete queer apo teori queer, dhe se lufta për barazinë e grave është jashtëzakonisht e rëndësishme sot dhe tani, është e nevojshme të njihen dallimet e brezave, pozicionimi i tyre dhe vendet e motivet identifikuese, prandaj i gjithë komuniteti LGBTIQ ka pasionet e veta, agjenda e veta, por edhe polemikat e veta. Dhe a është të menduarit dhe/ose të jetosh përtej matricës heteroseksuale e vetmja kërkesë feministe që po e vendosim sot, të vetëdijshme në të njëjtën kohë sa shumë telashe ka prodhuar, siç bëri të njohur Judith Butler në vitin 1990, në librin e saj të famshëm “Gender Trouble: Feminism and the Subversion of Identity”? Por, ajo që mua, si pjesëtare e të ashtuquajturit brez i vjetër i feministeve më bën jehonë gjatë gjithë kohës, dhe që ne e kemi anashkaluar, pra atë që na ka munguar në dy dekadat e fundit, ka të bëjë pikërisht me çështjen e barazisë si një projekt emancipues i të gjitha qenieve njerëzore, veçanërisht të grave. Si të vihet sërish në fokus çështja e grave? Dhe pse barazia e grave, kur konsiderohen si të rendit të dytë, duhet të anulohet në çfarëdo mënyre çështjen e barazisë së të gjithë atyre të tjerëve që diskriminohen për shkak të karakteristikave të tyre të ndryshme seksuale/gjinore, klasore, etnike, racore apo migrante?

Jemi dëshmitarë se barazia gjinore, veçanërisht barazia gjinore e grave, sot fatkeqësisht i përket temave me pak interes jo vetëm tek të rinjtë, sado që ata/o e konsiderojnë veten feministë, por edhe si tema që pothuajse nuk e tërheqin vëmendjen e publikut. Dhe kjo nuk është për shkak se barazia gjinore e grave është arritur në një masë më të madhe, ose më të vogël, dhe për këtë arsye barazia e grave në hapësirën publike nuk duhet të avokohet, ose, për shembull, sepse më shumë gra në poste drejtuese kanë status të barabartë. Përkundrazi, pozita e gruas, si në rajonin tonë ashtu edhe në botë, me gjithë proklamimet dhe aktet ligjore që e promovojnë barazinë në nivel ndërkombëtar dhe kombëtar, sado paradoksale të duket, është jashtëzakonisht shqetësuese.

Konteksti në të cilin jetojmë, pavarësisht nëse po flasim për nivel lokal apo global, në të njëjtën kohë neutralizoi dhe “paqësori” kërkesat feministe brenda procesit të integritimit gjinor, veçanërisht nga vitet 2000 e në vazhdim. Nga ana tjetër i pengoi disa nga mundësitë e veprimtimit feminist për shkak të ca turbulencave dhe bashkimeve të reja të famshme - konsumerizmit dhe vëllazërisë kapitaliste-militariste brenda kapitalizmit global.

Kur e adresojmë problemin e parë, duhet theksuar se feministet në vendin tonë dhe në botë mbështetën

me gjithë zemër agjendën e barazisë gjinore të shprehur në konceptin e integritimit gjinor, i cili u iniciua në Konferencën Botërore për Gratë në Najrobi, në 1985, dhe e cila më pas u përdor si një strategji ndërkombëtare për zbatimin e politikës së barazisë gjinore, e miratuar në Konferencën e Katërt Botërore të Kombeve të Bashkuara për Gratë, në Pekin, në 1995, si dhe në Këshillin e Evropës në 1998. Promovimi i politikës me ndërgjegjësim gjinor në të gjitha nivelet (nga politika në arsim, nga bota e privatësisë në tregun e punës), e mbështetur nga mekanizma dhe mjete institucionale, nënkuptonte një hap të madh ligjor përpara për feministet, por edhe detyrimin e çdo shteti që të angazhohet në mënyrë aktive në arrijtjen e barazisë së grave dhe gjinive/sekseve të tjera. Por, shpejt u bë e qartë se jo vetëm që rendi normativ nuk mund t'i përgjigjet problemit të modeleve të diskriminimit të rrënjësura në shoqëri dhe të jotransparencës së bazuar në seks/gjini, por se për qeveritë e shumë vendeve, përfshirë Kroacinë, çështja e barazisë

gjinore ishte vetëm një “kamufrazh”, ose një imazh simbolik i përshtatshëm që i shërben demokracisë së sapovendosur.

Prandaj, për mendimin tim, dy dekadat e fundit kanë qenë të vështira për feministet dhe organizatat feministe në çdo aspekt: ato duhej të angazhoheshin në një dialog rraskapitës dhe shpesh joproduktiv me akterët e autoriteteve politike në lidhje me zbatimin e politikës së integritimit gjinor (gender mainstreaming), sidomos për sa i përket luftës kundër dhunës ndaj grave, të drejtave riprodhuese dhe arsimimit me ndjeshmëri gjinore. Nga ana tjetër, shpërndarja e urdhrave që u vendosën para tyre në një mënyrë të re hapi pyetjen: kush është subjekti feminist, cili është legjitimiteti i tij dhe ku janë gratë? Gjithashtu duhet theksuar se zgjidhjet inovative, radikale dhe etike feministe janë të kooptuara dhe shpesh të pakuptimta brenda kalkulimeve të ndryshme politike kur bëhet fjalë për barazinë reale të grave, gjë që ka sjell zemërimin dhe zhgënjimin e disa feministeve dhe

largimin e tyre nga strukturat aktuale politike në vendet e tyre. Ndërsa teoricienja gjermane Birgit Sauer beson se në të ashtuquajturat vende në tranzicion të bllokut post-socialist, strategjia e konsolidimit të demokracisë u realizua përmes “normalizimit të maskulinizimit”, si në teori ashtu edhe në praktikë, ose, siç e përshkroi ajo në mënyrë të konsiderueshme diskursive: si transformimi nga mainstreaming në drejtimin të malestreaming (Sauer 2001:27), feministja slovene Vlasta Jalušič konsideron me të drejtë se një nga implikimet e politikës me vetëdije gjinore (gender mainstreaming) është prodhimi i “degendering” (Jalušič 2009:60), duke iu referuar aspekteve të ndryshme të pabarazisë gjinore, por edhe depolitizimit të “çështjes së grave”. Do të doja të shtoja gjithashtu një vërejtje feministe, se politikën e gender mainstreaming nuk mund të reduktohen në menaxhim tekniko-normativ dhe as suksesi i tyre nuk mund të analizohet vetëm nga numri i organeve për barazi gjinore.

Problemi i dytë i përmendur ka të

bëjë me pozitën e palakmueshme të gruas në tregun kapitalist të punës, e cila mbështetet nga ekonomia e punës shtëpiake, pa pagesë, kryesisht të kryer nga gratë (Burcar 2020:16), dhe bazohet në shfrytëzimin intensiv dhe pasigurinë e grave, shërbimin e tyre ndaj kapitalit të lëvizshëm dhe mohimit të qasjes në shumë burime.

Profesionet prestigjioze dhe të privileguara, ato që sjellin pushtet, fitim dhe ndikim, sipas të gjithë treguesve përkatës, më së shpeshti janë jashtë shtrirjes së grave. Aranzhimet e paskrupullta kapitaliste-politike janë në skenë, pasojat e të cilave janë rritja e pabarazive ekonomike globale dhe varfëria, e cila prek kryesisht gratë nga vendet e jugut të globit. Ndërkohë që media, duke prodhuar mashtrime optike (simulakrume), promovon kategoritë e suksesit dhe konkurrencës si leva për përgjegjësinë individuale të seclit prej nesh brenda ekonomisë neoliberalë. Njëkohësisht, në të njëjtën paketë mediatike pohohen stereotipat e seksualizuar gjinorë, sipas të cilëve gratë po bëhen gjithnjë e më shumë objekt i komifikimit të krijuar rishtas (në formën e një “vajze të sponsorizuar”, ose një objekti joshës në botën e tregtisë apo prostitucionit).

Shkurtime, me çdo analizë serioze të barazisë substanciale të grave ne duhet të jemi në gjendje ta zbulojmë lidhjen midis tregtisë së grave dhe mashtrimeve efikase të kapitalizmit global, si dhe lidhjen midis feminizimit në rritje të punës dhe pozitës së skllëverve e grave me dinamikën e ekonomisë libidinale të spektaklit, kapitalizmit politiko-financiar e militarizimit të shoqërisë. Unë besoj se shumë çështje janë përsëri aktuale sot, për të cilat qindra mijëra gra protestuan në dekadat e para të shekullit të 20-të, duke filluar nga 8 marsi 1857, kur punëtorët e tekstilit protestuan publikisht në Nju Jork, duke lënë të kuptohet për rezistencën dhe luftën e grave për të drejta të barabarta me burrat. Kërkesat për paga më të mira dhe përmirësimin e kushteve të punës i përkasin korpusit të të drejtave njerëzore të grave dhe kanë të bëjnë me gratë si subjekte të barabarta dhe të drejtën e tyre për një jetë dinjitoze e të barabartë, si dhe për zgjedhje. Sepse barazia e vërtetë e grave nuk është vetëm një çështje e barazisë si barazi normative me burrat, por hap hapësira dhe imagjinata të lirisë, kryesisht duke premtuar liri nga kushtet e shtypjes.

Në atmosferën e tendencave neokonservatore dhe retrograde gjatë dy dekadave të fundit, të shënuara nga shprehja “politika antigjinore”, e cila do t’iu grabiste grave të drejtat e tyre tashmë të zgjedhura si dhe idenë e lirisë, angazhimi feminist është drejtuar në të dyja kërcënimet në të njëjtën kohë. E drejta e luftuar për të votuar, e drejta e zgjedhjes riprodhuese dhe zgjedhja seksuale, autonomia trupore, pavarësia ekonomike dhe statusi i barabartë i punës, drejtësia epistemologjike, transgresiviteti i identifikimit seksual/gjinor, e drejta për jetë pa dhunë patriarkale - janë pikat aktivizuese të betejave feministe sot. Mundësia e suksesit të tyre varet nga mbështetjet dhe lidhjet transgjeneracionale, solidariteti feminist dhe aleancat më të gjera të akterëve përparimtarë. A jemi gati për këtë sot dhe në këtë 8 Mars?

Autorja është teoriciene feministe, profesore dhe aktiviste e paqes / Qendra për Studime të Grave dhe Universiteti Vern, Zagreb.



Urrejtja ndaj grave në politikë, online!



Rezarta Delibashzade Krasniqi

Rritja e dezinformimit gjinor ndër vite ndikon në uljen e gatishmërisë që gratë të angazhohen dhe kontribuojnë në jetën publike dhe atë politike.

Republika e Kosovës, fatmirësisht, deri më tani ka pasur dy presidente gra, mirëpo pjesëmarrja e grave në proceset politike dhe vendimarrëse mbetet ende çështje për t'u adresuar. Përfshirja e grave në listat zgjedhore, si pjesë e përbushjes së kuotës dhe qasje të barabartë nga ana e subjekteve politike, e tregon jogatishmërinë e tyre për t'i fuqizuar si udhëheqëse të ardhshme, kjo si rezultat i paragjytimeve shoqërore.

Bazuar në hulumtimin e FES-it për pjesëmarrjen aktive të grave në politikë, sa i përket ndërlikimit mes shprehjeve të pikëpamjeve në vendin e punës dhe një partie politike, shumica e të anketuarave (midis 73-78%), refuzuan të përgjigjen ose thanë se nuk ishte e zbatueshme. Andaj kjo tregon se gratë janë më të hapura për t'i shprehur pikëpamjet e tyre politike në qarqet e ngushta familjare, ku frika nga paragjykitimi është më pak i mundur - sesa në qarqet e jashtme me audiencë më të madhe. Ky hezitim mund të jetë për shkak të frikës së paragjykitimit nga të tjerët, ose standardit të lartë që ato ia caktojnë vetes, për t'i paraqitur publikisht mendimet e tyre politike. Ndërsa hulumtimet e viteve të fundit sa i përket aktivitetit politik tek

gratë tregojnë se ka rënie për sa i përket vetëbesimit se mund të ndikojnë në vendimet politike, apo të angazhohen në subjekte politike, me një përqindje shumë të ulët, pothuajse 3%.

Nga hulumtimet e fundit në Demokraci për Zhvillim (D4D), burimi i marrjes së informacionit ka pësuar ndryshim ndër vite, ku tashtë shënon rritje marrja e informacionit nga rrjetet sociale në vend të televizionit si burim primar, e sidomos temat që ndërlikohen me politikë, me mbi 41%.

Monitorimi i platformave dhe rrjeteve sociale (të realizuar nga D4D) mbi shpërndarjen e gjuhës së urrejtjes kundrejt grave që janë aktive në politikë, tregon se gratë përballen me dhunë dhe ngacmim online më shpesh nga burrat sesa nga gratë (burrat shkruajnë 89.6% të komenteve me gjuhë të urrejtjes, kurse gratë 10.4%). Rastet e dezinformimit gjinor në media mbledhin mbi 86 reagime për një lajm - shifër tri herë më e lartë se ndërveprimi tipik për të gjitha lajmet.

Rritja e ndërveprimit online zgjeron edhe vëmendjen globale ndaj çështjeve që kanë të bëjnë me gratë dhe përvojat e tyre, ngacmimet dhe dhunën, si virtualisht ashtu edhe në realitet. Përderisa në internet mund të shprehen mendimet mbi çështje sociale dhe politike, këto hapësira janë bërë platformë për dhunë online ndaj grave dhe kryesisht mizogjinisë së shprehur në tekste.

Dhuna online drejtuar grave përfshin mënyra të ndryshme agresioni dhe frikësimi që kanë qëllim përjashtimin e grave nga politika vetëm bazuar në gjininë e tyre. Narrativat e njëanshme dhe targetimi individual i grave shfrytëzohen për t'i dekurajuar ato që të përfshihen në jetën publike dhe politike. Në të njëjtën kohë, përcjell qartë këtë mesazh në publik që edhe më tej e forcon men-

talitetin patriarkal në vendin tonë.

Nga politikanet më të atakuara në rrjete sociale përmes dhunës online janë deputetja Mimoza Kusari Lila dhe Presidentja Vjosa Osmani Sadriu, përcjell edhe nga Vlorë Çitaku, Doarsa Kica Xhelili, si dhe gra që janë aktive jashtë jetës politike, si Flutura Kusari e Besarta Hoti. Këto ishin rastet me klikueshmërinë dhe shpërndarjen më të lartë në rrjete sociale, ku gjuha e urrejtjes ka qenë tejet e shprehur.

Ndikimi i patriarkalitetit në përdorimin e gjuhës së papërshtatshme është faktor që s' duhet anashkaluar, e kjo paraqitet edhe në rastet ku gratë që bëjnë pyetje ose i sfidojnë kolegët e tyre burra, përjetojnë sulme të theksuara në rrjete sociale.

Margjinalizimi i dyfishtë është mjaft i theksuar gjithashtu, ku gratë e shtresave të ndryshme të marginalizuara mund të përballen me fushata të shtuara të dezinformimit që shfrytëzojnë dimensionet e shumta të identitetit të tyre, si raca, përkatësia etnike, ose orientimi seksual.

Fenomeni i gjuhës së urrejtjes dhe mizogjenisë në rrjete sociale, nuk mund të ndalohet apo ndërpritet me shkop magjik, por duhet luftuar me mekanizma institucionalë dhe shoqërorë. Ndër hapat e parë janë respektimi i Kodit të Etikës nga mediet, luftimi i vazhdueshëm i dezinformimit, si kërkesë nga vetë qytetarët, për ta identifikuar dhe mos e shpërndarë atë, raportim i përgjegjshëm nga ana e mediave për titujt dhe paraqitjet e rasteve kur flitet për gra, si dhe edukimi i gjeneratave sa më të reja për të mos rënë pre e dezinformimit dhe mizogjenisë, por të jenë kontribues në një shoqëri pa fyerje e urrejtje.

Autorja është Drejtore Ekzekutive në D4D.



Më shumë gra në pozita udhëheqëse në institucione të drejtësisë, më shumë drejtësi për gratë



Arrita Reznici

Të gjithë e njohin simbolin e drejtësisë - një grua, me sy të lidhur, duke mbajtur peshoren në njërin dorë dhe shpatën në tjetrën, për të treguar paanshmërinë në njërin anë dhe fuqinë e drejtësisë, në anën tjetër. Por kjo peshore nuk ka qenë e balancuar gjithëherë për sa i përket përfaqësimit të grave në sistemin e drejtësisë në Kosovë. Në kuadër të këtij sistemi ka numër të madh të grave që e kanë përgatitjen dhe guximin profesional për të ushtruar pozitën e gjyqtare, prokurores dhe avokates, në mënyrë të drejtë dhe të paanshme. Mirëpo, ky përfaqësim i grave në sistemin e drejtësisë nuk manifestohet në mënyrë të barabartë edhe në raport me pozitat udhëheqëse kryesore të sistemit të drejtësisë. Sot, Këshilli Gjyqësor, Këshilli Prokurorial, Gjykata Supreme, Zyra e Kryeprokurorit të Shtetit dhe Oda e Avokatëve të Kosovës, udhëhiqen nga burrat. Asnjëra nga këto pozita të rëndësishme të sistemit të drejtësisë nuk i është besuar një gruaje për ta dhënë kontributin në menaxhim dhe administrim. Munge-

sa e vullnetit për t'i besuar gruas pozita drejtuese, fatkeqësisht, pastaj përkehetet me mungesë të mbështetjes adekuate dhe trajtim jodinjitoz për viktimat e dhunës me bazë gjinore, duke e kthyer kështu sistemin e drejtësisë në Kosovë jorallë në shkelësin kryesor të të drejtave dhe lirive themelore për gratë.

Në përditshmëri gratë vazhdimisht hasin në pengesa dhe vështirësi për adresimin e të drejtave të tyre. Trajtimi jo i barabartë në vendimarrje, por edhe mosofrimi i kushteve të barabarta për të ushtruar përgjegjësi, ndikon që roli dhe zëri i gruas në Kosovë mos ta marrë vëmendjen dhe rëndësinë e duhur. Një qasje e tillë manifestohet në kufizimin e gruas për t'i realizuar të drejtat e saj në praktikë edhe për shkak se niveli i punësimit të grave në Kosovë ende mbetet sfidues. Rrjedhimisht, varshmëria e tyre nga partnerët, apo anëtarët tjerë të familjes, u krijon vështirësi socio-ekonomike, duke kufizuar kështu qasjen e tyre në drejtësi. Kjo pastaj dukshëm kufizon edhe ngritjen e zërit për t'i sfiduar praktikat diskriminuese në vend.

Korniza ligjore e Kosovës në vazhdimësi i është nënshtuar reformave në përpjekje për avancimin e legjislacionit në promovimin e barazisë gjinore, lufimin e dhunës me bazë gjinore, diskriminim dhe mbrojtjen e të drejtave të grave. Megjithatë, kjo përpjekje mbetet vetëm gjysmake pa përfshirjen e plotë dhe kuptimplote të grave, jo vetëm si pjesëmarrëse, por edhe si

vendimmarrëse brenda sistemit të drejtësisë.

Statistikisht dëshmohej se përfaqësimi i grave në sistemin e drejtësisë në Kosovë lë shumë për të dëshiruar. Nga raportet e Institutit të Kosovës për Drejtësi (IKD), të publikuara në vitin 2023, rezultoi se nga 419 gjyqtarë sa ka pasur sistemi gjyqësor në fund të vitit 2022, vetëm 35% e tyre janë gra, përderisa 65% janë burra. Kurse, nga 10 gjykatat kryesore në vend, vetëm 2 prej tyre udhëhiqen nga gratë, ndërsa 8 të tjera nga burrat. Në sistemin prokurorial, nga 183 prokurorë gjithsej, rreth 43% janë gra dhe 57% të tjerë janë burra. Përderisa pozitë të Kryeprokurorit në 10 Prokuroritë në vend mbajnë vetëm prokurorët burra dhe asnjë grua. Edhe në organet më të larta, në Këshillin Gjyqësor të Kosovës (KGJK) dhe atë Prokurorial (KPK), situata është njësoj. Të dy këta Këshilla udhëhiqen nga burrat, kurse nga 11 anëtarët në secilin nga këshillat, përbërja e tyre konsiston në përqindje dërrmuese të burrave, në një raport 7 me 4 në KGJK dhe 8 me 3 në KPK.

Se sa është paradoksal nënpërfaqësimi i gruas në sistemin e drejtësisë në Kosovë, përfshirë pozitë kyçe në sistemin gjyqësor, prokurorial dhe atë të avokatisë, shërben edhe fakti se Kosova është një ndër vendet e pakta në Evropën Juglindore që në periudhën përgjatë dhjetë vjetëve të fundit është udhëhequr nga dy presidente gra. Kështu, duke e njohur rolin kyç të grave në ndër-

timin e një shoqërie të drejtë dhe të barabartë, të drejtat e grave nuk duhet trajtuar vetëm mbi aspektin e avancimit të kornizës ligjore, por edhe të zbatimit në praktikë dhe ndryshimit të mentalitetit se pozitat kyçe në sistemin e drejtësisë apriori janë të destinuara, apo "të rezervuara", vetëm për burrat.

Prandaj, është e rëndësishme që të sfidohen stereotipat gjinorë për ndryshimin e këtij mentaliteti dhe kësaj praktike, për të ndikuar po ashtu edhe në frymëzimin e gjeneratave të reja. Sepse sa më shumë përfshirje të grave, dhe në veçanti sa më shumë gra që mbajnë pozita udhëheqëse përbrenda sistemit të drejtësisë, aq më shumë inkurajohen brezat e rinj në aspiratat e tyre dhe kjo çon në krijimin e një fuqie punëtoresh më të balancuar në një periudhë të ardhme jo aq të largët. Njëkohësisht krijon një shoqëri ku mundësitë janë të barabarta për të gjithë, ku barrierat janë të padukshme dhe kështu krijohet një kulturë e barazisë shoqërore.

Kjo barazi, e cila arrihet përmes një sistemi gjithëpërfshirës të drejtësisë, automatikisht bën që sistemi të perceptohet si më i besueshëm, gjë që nxit ndjesitë se është sistem i drejtë dhe i paanshëm. Një drejtësi e kësaj forme padyshim që rrit kërkesën për adresimin e të drejtave të qytetarëve, në veçanti të grupeve të marginalizuara, dhe bën që kërkesa për qasje në drejtësi vazhdimisht të jetë në rritje, duke e sfiduar kështu hendekun midis dispozitave ligjore dhe përvojave jetë-

ore, që ndikon tutje në avancimin e kornizës ligjore dhe aspekteve shoqërore.

Ofrimi i drejtësisë së barabartë për të gjithë mbetet gur-themel i çdo shoqërie demokratike. Prandaj, në mënyrë që lehtësimi i qasjes në drejtësi për gratë t'i japë rezultatet e veta, qëndrimet diskriminuese dhe normat patriarkale brenda sistemit të drejtësisë duhen luftuar. Dhe gratë, si një grup i marginalizuar historikisht, mund të kontribuojnë më lehtë në adresimin e çështjeve që prekin në mënyrë disproporcionale vetë ato, por edhe grupet tjera të marginalizuara, duke krijuar kështu një sistem jo vetëm të drejtë dhe të barabartë, por edhe të ndjeshëm dhe të përshtatshëm me nevojat dhe shqetësimet e grupeve të ndryshme.

Rrjedhimisht dhe përfshirja e grave në sistemin e drejtësisë nuk është vetëm çështje e të drejtave të barabarta për të cilat luftohet në vazhdimësi, por është një element thelbësor i ndërtimit të një sistemi të drejtë, efektiv dhe gjithëpërfshirës. Duke promovuar dhe mbështetur në mënyrë aktive pjesëmarrjen e grave në të gjitha aspektet e sistemit të drejtësisë, ne mund t'i afrohem arrijtes së një shoqërie ku sistemi i drejtësisë do të mbrojtë me të vërtetë të drejtat dhe dinjitetin e të gjithë qytetarëve të saj, pa dallim.

Autorja është Menaxhere e Programit në IKD dhe Koordinatorë e Qendrës për Ndihmë Juridike falas të IKD-së.

Me boks kundër paragjykimeve

Boksi është sport që dominohet nga burrat. Mirëpo, ndryshimet në Kosovë kanë filluar me dy gra - njëra kampione e boksit amator dhe tjetra gjyqtare e boksit profesional.

Vjosa Çerkini

25-vjeçarja Adea Berisha jeton në Pejë. Puna e saj është e veçantë: ajo është e vetmja gjyqtare profesionale e boksit në Kosovë, por edhe më gjerë. Profesionin thajse iu përcaktua kur ishte në djep, pasi edhe babai i saj, Florim Berisha, ishte boksier aktiv dhe tashmë është edhe gjyqtar në boksion profesionist.

“Kam dashur të boksoj që e vogël, sepse kam bërë boks gjithmonë me babanë dhe kjo më ka magjepsur”, thotë Adea.

Por, babai dhe nëna e saj ishin çdo gjë tjetër veçse entuziastë për këtë ide, prandaj u përpoqën ta shtynin atë në sporte të tjera. Kur asgjë nuk ndihmoi, u shtuan komentet, duke thënë se fytyra dhe bukuria e saj mund të shkatërroneshin nga goditjet në boks.

“Prindërit e mi nuk bënë mirë që donin të më largonin nga boksi, sepse edhe ashtu nuk kisha mundësi të boksoja. Nuk kishte vajza të tjera si partnere në ring”.

Rastësisht, kur ishte 19 vjeç, ajo zbuloi mundësinë e një karriere si gjyqtare në boks dhe menjëherë dëshiroi që ta provonte, meqenëse dashuria për boksin ishte shumë e madhe. Paragjykimet e para ndaj saj u shfaqën për shkak të fizikut. Ishte 168 cm e gjatë, peshonte afro 50 kilogramë dhe ishte shumë e re në moshë. Komentet e llojit: “Si mundet një vajzë e vogël si ti t’i ndajë dy boksierë të peshave të rënda?”, e të ngjashme, ishin të shumta. Por, Adea nuk merrej me to. Vullneti i saj për ta dëshmuar veten ishte shumë i fortë dhe kështu e mori vendimin të cilin prindërit e saj në fund e mbështetën.

Asaj menjëherë iu desh ta dëshmonte veten kundër burrave në klasën e gjyqtarëve të boksit. Përballej me paragjykime, sepse më parë nuk kishte pasur raste të tilla. “Kjo nuk është për vajzat”, i thoshin kolegët e saj të ardhshëm.

Në moshën 19-vjeçare e realizoi ëndrrën. U bë gjyqtare boksi.

Në sezonin 2018/2019 e filloi karrierën si ndihmës-gjyqtare. Pas përfundimit të suksesshëm të provimeve për licencim, ajo tashmë është gjyqtarja e vetme grua në boksion profesionist. Që atëherë i ka drejtuar 33 ndeshje, vetëm dy prej të cilave me boksierë gra. Shpreson që në të ardhmen të drejtojë gara ndërkombëtare, veçanërisht në Kampionatin Botëror të Boksit për Gra.

Sipas hulumtimit të realizuar nga Qendra Kosovare për Studime Gjinore në vitin 2022, “Gratë dhe vajzat në fushën e sportit”, në 80.5% të rasteve të anketuarat e kishin identifikuar mungesën e financimit si sfida kryesore, ndjekur nga



gjendja financiare personale (59.7%) dhe diskriminimi në bazë gjinore (32.5%). Adea i konfirmon këto statistika si tri problemet kryesore me të cilat, njëjtë si ajo, përballen gratë në sport.

“Nuk mund ta siguroj jetesën nga ky profesion, nuk paguhet mirë. Kjo është dhe arsyeja pse unë paralish punoj si zyrtare ligjore”.

Ajo ka të ardhme si gjyqtare

boksi, sepse kolegët e saj në Kosovë të gjithë janë mbi 50 vjeç dhe, natyrisht, të gjithë burra. Hapësira për t’u zhvilluar profesionalisht për të është e pafundme.

Edhe 24-vjeçarja Donjeta Sadiku u detyrua t’i kalonte të njëjtat paragjykime se boksi është dikaster i burrave. Megjithatë, ajo është kampione e Ballkanit në boks për vitin 2023.

“Që në fillim kam pasur shumë vështirësi si grua. Gjithmonë më është dashur të dëshmoj se jam boksierë e mirë”, shprehet Donjeta.

Rruga e saj për t’u bërë kampione u shënuar nga pengesa të mëdha, në dukje edhe të pakapërcyeshme. Kishte paragjykime që janë klasike ndaj atyre grave që duan ta afirmojnë veten në një fushë mashkullore.

Kur politika është më e fortë se boksi

Kur zhvilloheshin garat në shtetet që nuk e njihnin Kosovën si shtet sovran, asaj i refuzohej hyrja apo konkurrimi si përfaqësuese e shtetit tonë. Kjo ka ndodhur tri herë deri më tani. Nuk i është lejuar të garojë në Indi dhe e ka anuluar pjesëmarrjen në Kampionatin Europian të këtij viti në Serbi. “Jam vërtet e fortë, nuk jam e shqetësuar për sportin, por kur kaloj muaj duke u përgatitur për një ndeshje boksi dhe një ditë më parë zbuloj se nuk më lejohej të hyj në vend, është vërtet zhgënjyese”.

Këto padrejtësi padyshim që e kanë motivuar atë duke e nxitur në fuqi për fitimin e medaljeve. Ndër të tjera, ajo u bë Nënkampione Botërore për Juniorë 2015, Nënkampione e Europës 2017, Kampione e Europës 2018, Medalje Bronzi e Botës dhe Europës 2020 dhe Kampione Ballkanike 2023. Lista mund të ishte më e gjatë nëse ajo do të lejohej të konkurronte kudo. Shteti sovran i Kosovës ende nuk njihet nga plot shtete. Serbia vazhdon ta pengojë anëtarësimin e Kosovës në institucionet ndërkombëtare kudo që është e mundur. Lehtësimi i situatës politike ndërmjet Kosovës dhe Serbisë nuk duket i mundshëm në afat të shkurtër, përkundrazi, mosmarrëveshjet për gjëra të supozuara të vogla si tregat përshkallëzohen menjëherë në kërcënime për vendosjen e ushtrisë.

Donjeta është e vetmja grua kosovare që ka arritur karrierë të shkëlqyer në boks. E nisi në kategorinë e boksit amator, por, njëjtë si Adea, nuk mundi që e vetme t’i mbulononte të gjitha shpenzimet nga boksi.


Ajo konsiderohet si një nga tri boksieret gra me goditjet më të fuqishme në botë. Është e bindur se do të shkojë shumë lart në nivelin amator, apo edhe atë profesional. Patjetër dëshiron të marrë pjesë në Olimpiadën e ardhshme dhe, në varësi të suksesit, mundësisht të kalojë në fushën profesionale. “Nuk mund ta parashikosh kurrë në Olimpiadë, por mendoj se të paktën mund të fitoj një medalje bronzi”.

Me gjithë sukseset dhe titujt e shumtë kampionalë, nuk ka mbështetje financiare nga Federata e Boksit të Kosovës. Ajo as që kërkon para personalisht, por mendon se duhet të paktën të marrë pajisje adekuate për procesin e saj të stërvitjes si një olimpiiste e ardhshme.

Dy gra të forta si Donjeta Sadiku dhe Adea Berisha po e afirmojnë veten për mrekulli në Kosovën patriarkale.

Autorja është gazetare.





BASHKËFINANCUAR NGA:



Bashkëfinancuar nga
Bashkimi Evropian



Sweden
Sverige

